

1372. robur Veneti exercitus erat, aliquæ expeditiones per id tempus factæ dicuntur, sed nulla quidem memoria digna. Milites plerique, qui magis graves suis quam hostibus essent, ob assidua latrocinia, ex ipsis castris jussi sunt abire. Apud quosdam reperio, Rainerium Vascum, quem ultro se imperio abdicasse diximus, & ipsum cum ignominia exauctoratum. Jacobus Maurus ad imperium classis missus, quum circa præsidia quæ Delphinus erexerat, aliquandiu stationem habuisset, in morbum incidit, quo implicitus Venetias est delatus. Rainerio abeunte, terrestrium copiarum imperium Alberto Corregiensi datum. Per eos dies, quibus is cum Leonardo & Andrea Dandulis, & Petro Fontana legatis in castra venit, in stagnis res parum prospere gesta est. Muniebatur locus tanquam omnium opportunissimus a Venetis, non procul a præidiis, quæ Delphinus erexerat. Eos operi intentos ex improvviso Carrarius adortus turbat primo, inde fundit fugatque. Ceciderunt primo hostium incursum patricii sanguinis quidam, atque cum his sagittariorum nonnulli, reliqui ad naves præcipiti fuga compulsi. Sed non tam male hic, quam sæliciter postea circa castra dimicatum est. Nam quum jam hostes in conspectu essent, pararetque Venetus communire locum, qui medius inter utraque castra erat, Stephanus Transilvanus, Pannonici equitatus ductor, ut ab incæpto opere Venetum averteret, structa acie eo processit. In eum Leonardus Dandulus confestim eduxit, nullam pugnandi moram, si per hostem licuisset, facturum. Sed barbarus quasi consulto eo die prælio abstinuit. Postridie vero Petrus Fontana, penes quem illius diei imperium erat (alternis enim cum Corregiano imperitabant) ferociter & ipse, ubi illuxit, in aciem descendit. Hostis nec ipse pugnam detrectavit, injectoque certamine, continuo Venetus edicit, ut relictis equis, cataphracti equites pedestre prælium capefferent: hortaturque obeundo aciem, jubetque suos ut aut vincere in animum inducant, aut ad unum cadere, habiturum se pro hoste, ac infesto ferro petiturum, quem respicere fugam viderit: affuturum in pri-

*Veneti parum prospere pugnant cum Pannonibus.*